



UKA15/37
20. Oktober 2015
Iddimanggiu Bianco

Nunaqavissut tikisitallu akornanni Namminersorlutik Oqartussani, Namminersorlutik Oqartussat suliffeqarfiutaanni kommuninilu sulisut qanoq agguatarsimanersut pillugu kisitsisinnorlugu (statistisk) paasisutissamik Naalakkersuisut UPA2016-imi saqqummiusseqqullugit peqquneqarnissaannik Inatsisartut aalajangiiffigisassaatur siunnersuut. Nalunaajaaneq Kalaallit Nunaannut suliffissarsiortut killilersimaarnissaat pillugu Inatsisartut inatsisaat saqqummiussinermi aallaaviusaaq.
(Inatsisartunut ilaasortaq Suka K.Frederiksen, Siumut)

Siullermik siunnersuummut soqutiginarumut qujanaq.

Siullermik eqqaarusutara tassaavoq tikisitamik sulisoqartarnerata tunngavigisaa, tassalu ilinniarsimasumik sulisoqartariaqarneq peqqutaataalluinnartarnera. Ilaatigut peqqinnissaqarfinni tamanna pingaaruteqassusaa ilisimavarput. Qaffasinnerusunik ilinniagalinnik nunatsinneersunik nassaarsinnaannginnerup kingunerisarpaa tikisitsineq. Tamannalu qimakkartornissaa tamatta isumaqataaffingngitsuunngilarput.

Ullutsinnili tikisitaqartalernikuuvugut eqqiaasunik ingasunilluunniit, ingammik kangianeersunik, tamanna akunnittarfinni takussaasorujuuvoq. Tamanna tikisitsisarnerup isumaanik uniinerusutut isigaara, tassami nunatsinni suliffissaaleqisut amerlaqaat.

Nunaqavissunik sulisuuteqalernissaa qangalili eqqartorneqartartut ilagaat. Tassami ersarissinkuuvoq qanorluunniit ilinniagakitsigigaluaruit suliffissamik peqartarnera, taassumalu kingunerisassagaa pikkorissaaqqinneq, tamanna aamma ilinniarsimasunut atuuppoq. Taamatut qaffakkartorsinnaaneq iliuusissiasaaqqippoq.

Nunatsinni qaffasissunik ilinniarsimasut amerliartorput, tamannalu aqut pingaaruteqarlunnartutut isigisassaraarput. Ilinniarsimasut atorluarnerunissaanik oqariartaaserilernikuuarput. Qanorli piviusunngortissavarput atugassarititaasut aamma malitsigissappagit?

Ullutsinni ajornartorsiutitta ilagaat ilinniarsimallutik angerlartut ilaat suliffissaqaraluarlutik atugassarititagitut aporfeqartut, meeqqeriviusinnaavoq, angerlarsimaffeqarnerusinnaavoq allarluinnarluunniit.

Taamaattumik Suka K. Frederiksen siunnersuuteqarnermini tunngavigisaata ilagisaa tassaasoq atorfiit nunaqavissunik taarseriartuaarnissaannut iliuuseqarnissamik pilersaarummik ujartuineru Inuit Ataqatigiinniit eqqartorluagassatut aammattaaq pilersarusiugassatut pingaartilluinnarparput.

Tamanna tunngavigalugu siunnersuut isumaqatigaarput.